

BOSNA I HERCEGOVINA
Federacija Bosne i Hercegovine
UNSKO – SANSKI KANTON
Skupština



BOSNIA AND HERZEGOVINA
Federation of Bosnia and Herzegovina
UNA – SANA CANTON
Assembly

Poslanička pitanja

Sa XVI redovne sjednice Skupštine Unsko – sanskog kantona
koja je održana 08.02.2016.godine

Bihać, 08. februar 2016. godine

Predsjedavajući Skupštine Unsko – sanskog kantona, Nijaz Hušić:

Ja molim sve zastupnike koji imaju poslanička pitanja za današnju sjednicu da odmah izvrše prijavu kako bi mogli rasporediti vrijeme u skladu sa Poslovníkom. Prvi za zastupničko pitanje javio se uvaženi zastupnik Egrlić Ahmet. Izvolite. A neka se pripremi kolega Beganović.

Poslanik Ahmet Egrlić:

Uvaženi zastupnici i zastupnice, članovi Vlade, ministri, Predsjedavajući sa dopredsjedavajućim, cjenjeni gosti, mediji, sve skupa vas pozdravljam i selamim.

Ima jednu inicijativu i ja ću je pročitati:

U skladu sa Poslovníkom Skupštine Unsko – sanskog kantona pokrećem inicijativu za disperziju institucija Unsko – sanskog kantona u općine Unsko – sanskog kantona. S obzirom da naša država pretenduje intenzivirati svoj put ka Evropskim integracijama u predstojećem periodu, smatram važnim implementirati neke od ključnih odrednica funkcioniranja Evropske Unije. Prije svega iskustveno je dokazano da decentralizacija donosi brojne koristi za društvo, potiče građansku percepciju u javnim poslovima, osigurava veće razumijevanje za brige i potrebe građana, daje priliku za uspostavljanje novih načina djelovanja sa novim strukturama, osigurava veću uspješnost i učinkovitost u obavljanju usluga, stvara osjećaj zajedništva i kohezije, povezuje civilno društvo sa državnom vlašću. U tom kontekstu izdvojio bih naglašavanje važnosti uloge lokalne zajednice kao oblika političkog organizovanja u državama Evropske Unije i u okviru toga princip supsidijarnosti koji stoji iza decentralizacije i zahtjeva da svaka nadležnost bude tamo gdje se može relevantno upotrijebiti, a uzimajući u obzir političku dimenziju odluke bi se morale donositi na relevantno najbližem nivou građana. Dakle, cijenim da bi mi mogli donijeti odluku da kantonalne institucije, agencije, zavodi i ostalo što je moguće možemo dakle izmjestiti u općine, u lokalne zajednice i tako na jedan ravnomjeran način uticati na razvoj i na određene političke procese koji će biti u narednom periodu nužni.

Hvala lijepo.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Beganović. A neka se pripremi kolega Muslić.

Zamjenik Predsjedavajućeg Skupštine Unsko – sanskog kantona, Mirvet Beganović:

Poštovane dame i gospodo, Predsjedavajući, Sekretaru, ministri iz Vlade, predstavnici medija, međunarodnih organizacija, kolegice i kolege, koristim priliku da vas srdačno pozdravljam.

Ja imam jedno poslaničko pitanje. Upućujem ga Vladi Unsko – sanskog kantona, to jest ministarstvu finansija.

Da mi dostavi tačno stanje obaveza prema budžetskim korisnicima po svim osnovama. Ali ne ono tri plate, već tačno znači u iznosima bruto koliko je to obaveza.

Obrazloženje:

Svjedoci smo danas manipulacije oko kreditnih zaduženja i obaveza prema budžetskim korisnicima. I obično mi gasimo tu vatru na neki način, jesi li za ovo ili za ono. Da vidimo kolike su to ukupne obaveze i da vidimo na koji način ćemo dugotrajno tražiti to rješenje. Na žalost nismo postigli rješenje kada smo prošle godine digli kredit od 16 i po' miliona, kad smo imali 10.000.000 više punjenje PDV-a. Mene interesuje znači tačno stanje obaveza. Da se ne manipuliše. Ako je to toliko prevoza, toliko toplih obroka, to je toliko miliona. Pa da vidimo onda svi zajedno na koji ćemo način to riješiti. Ili da ponudi Vlada rješenje kako da rješi. Da ne bi doveli u pitanje opet štrajkove i ostalo.

Hvala lijepo.

Predsjedavajući Skupštine Unsko – sanskog kantona, Nijaz Hušić:

Zahvaljujem. Albin Muslić. Kolega Farko Hodžić je slijedeći prijavljeni za poslaničko pitanje.

Poslanik Albin Muslić:

Uvaženi Predsjedavajući, zamjenici, kolegice i kolege poslanici, predstavnici Vlade Unsko – sanskog kantona, medija, nevladinog sektora, uvaženi građani.

Imam jedno poslaničko pitanje na temelju Člana 190. Poslovnika Skupštine kantona, a odnosi se prema Resornom Ministarstvu nauke, kulture i sporta Unsko – sanskog kantona. A pitanje glasi:

Koje mjere je poduzelo Ministarstvo nauke, kulture i sporta Unsko – sanskog kantona u vezi sa nezakazivanjem i neodržavanjem sjednica Senata Univerziteta u Bihaću?

Naime, kao član akademske zajednice, te iz kolegijalnih interesa svojih kolega nastavnika i saradnika, te studenata, a bez namjere prejudiciranja razloga navedene pojave, smatram da je nužno postaviti ovo poslaničko pitanje prema resornom ministarstvu. Naime, zbog nesazivanja Senata na Univerzitetu u Bihaću imamo jako veliki broj problema, a među kojima ističem slijedeće: Prije svega, brojnim uposlenicima Univerziteta u Bihaću, ističu ili su već istekla, izbori u zvanja. Zatim, nije moguće zakazati odbrane doktorskih disertacija. I na kraju, imamo brojna pitanja iz domena studentskog standarda. Mislim da, opet kažem, bez ulaženja u razloge

nesazivanja Senata, da se ministarstvo nauke, kulture i sporta mora pozabaviti ovim pitanjem, jer danas imamo situaciju da uposlenicima na Univerzitetu u Bihaću su već istekli ugovori, a ne zbog njih samih, već njihovi izvještaji čekaju taj Senat da bi im se ugovori produžili i na taj način dovodimo u pitanje i odvijanje nastavnog procesa na Univerzitetu u Bihaću. Molim resornog ministra da da odgovor na ovo poslaničko pitanje, ako je moguće i u usmenoj formi danas, a ako ne barem u pismenoj formi.

Hvala lijepa.

Predsjedavajući Skupštine Unsko – sanskog kantona, Nijaz Hušić:

Farko Hodžić. A slijedeći za zastupničko pitanje, kolega Mirković.

Poslanik Farko Hodžić:

Uvažene kolegice i kolege, ministri u Vladi, mediji, gosti iz nevladinog sektora, poštovani građani, sve vas srdačno selamim i pozdravljam.

Ja ću postaviti dva poslanička pitanja. Prvo pitanje upućujem Ministarstvu obrazovanja, nauke i kulture i sadrži dva podpitanja.

Naime, prisutno je danas u javnosti različito oko upisa studenata na Univerzitet u Bihaću, pa neko brojeke 3.000, neko 6.000, neko 5.000 kaže. Ne znamo tačnu informaciju. S toga upućujem i tražim od ministarstva da dostavi tačnu informaciju o upisu studenata, što redovnih, što vanrednih, na Bihaćkom Univerzitetu, po organizacionim jedinicama i po smjerovima u zadnje četiri godine, da vidimo taj trend upisa studenata na Univerzitetu. I drugo podpitanje, da mi se dostavi informacija o upisu u prvi razred osnovne škole po općinama i po školama u zadnje četiri godine.

Drugo poslaničko pitanje upućujem Pravobranilaštvu i tražim da mi se dostavi informacija o stanju duga u budžetu Unsko – sanskog kantona, što fizičkih, što pravnih lica, a odnose se na završene pravosudne presude, ili presude ili postupke na sudu. I to po dva segmenta. Prvo, o stanju pozajmljenih sredstava iz budžeta Unsko – sanskog kantona i pod b) po pitanju korišćenja koncesionih dobara Unsko –sanskog kantona.

Hvala lijepa.

Predsjedavajući Skupštine Unsko – sanskog kantona, Nijaz Hušić:

Zahvaljujem. Željko Mirković. A slijedeći za zastupničko pitanje prijavljen je kolega Mladen Lonić.

Poslanik Željko Mirković:

Gospodine Predsjedavajući, uvaženi dopredsjedavajući, uvažene kolegice i kolege, predstavnici medija, predstavnici Vlade, međunarodnih organizacija, nevladinih organizacija, koji pratite rad Skupštine Unsko – sanskog kantona i naravno naši dragi slušaoci i gledaoci Javne Televizije Unsko – sanskog kantona koji pratite rad Skupštine, sve vas skupa pozdravljam.

Ja za današnju sjednicu imam dva pitanja. Prvo pitanje upućujem Ministarstvu poljoprivrede, vodoprivrede i šumarstva, Kantonalnom Pravobranilaštvu i Šumsko – privrednom društvu „Unsko – sanske šume“. A moje pitanje glasi ovako:

Koliko je otpisano duga po osnovu isporučene drvene mase, korisnicima znači drvene mase, pilanarima ili nazovite ih kako hoćete, po osnovu isporučene a ne plaćene drvene mase? Dakle, zanima me taksativno da se nabroji koji su to subjekti, koliko su ostali dužni i po kom osnovu je izvršen otpis? Da li je to dakle bio stečaj pa je onda bilo otpisano, nema od koga naplatiti, ili su neki drugi razlozi? Dakle, taksativno godina kad je stvoren dug, koliki je dug i razlozi pod kojima je otpisan i kad je otpisan, dakle od ova tri subjekta.

I slijedeće moje pitanje je takođe Ministarstvu poljoprivrede, vodoprivrede i šumarstva. Vezano je za Kantonalnu upravu za šumarstvo. Zanima me koliko danas dakle ima zaposlenih u Kantonalnoj Upravi za šumarstvo, koliku teritoriju pokrivaju kao čuvari šuma i kolika je sistematizacija Kantonalne Uprave za šumarstvo, odnosno koliki je procenat popunjenosti i u kojim dijelovima nije popunjena Kantonalna Uprava za šumarstvo onako kako bi to trebalo po propisima i po zakonu kad je u pitanju zaštita šuma i ovog dobra koje praktično predstavlja naš najveći resurs?

Hvala. To su moja pitanja. Hvala lijepo.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Lonić.

Zamjenik Predsjedavajućeg Skupštine Unsko – sanskog kantona, Mladen Lonić:

Ja pozdravljam sve prisutne.

Ja imam jedno delegatsko pitanje. Odnosi se Vladi Unsko – sanskog kantona, odnosno Ministarstvu poljoprivrede Unsko – sanskog kantona.

Svjedoci smo svaki dan požara na terenu Unsko – sanskog kantona. Mi vidimo požar svukuda, rastinje, bujad, sve se to pali, to se sve radi blizu šuma, blizu objekata i svega. Naši vatrogasci idu, ustvari vatrogasci opštinski idu gasiti te požare. Ali što idu i prave tu troškove, veći su troškovi što na velikim područjima ima mladorasta koji izgori. Jer taj mladorast radi nekoliko godina i on je taman iznikao, bilo kojeg, ili hrasta, ili bukve, ili jele, smrče, nije bitno i kad izraste do pola metra, neko dođe i zapali blizu bujad, to gori. I tu stvaramo velike, nesagledive štete u samom pošumljavanju i u svemu tome. A vidi se da i sama paljevina čini drugu strukturu zemljišta, jer zemljište postaje porozno i sve to. Zato ministarstvo poljoprivrede treba da ispita

ko radi, šta radi i šta se može povodom toga poduzeti da se to više ne radi. To se u nazad već više godina radi i niko ništa ne poduzima.

Predsjedavajući Skupštine Unsko – sanskog kantona, Nijaz Hušić:

U skladu sa Članom 190. Poslovnika Skupštine Unsko – sanskog kantona ja za danas imam jedno zastupničko pitanje koje upućujem Rektor i Senatu Univerziteta.

Naime, tražim informaciju o realizaciji kredita, odnosno stavljanje u funkciju opreme za koju se zadužio ovaj kanton a u svrhu boljeg opremanja Univerziteta u Bihaću. Dakle, tražim tačnu specifikaciju opreme koja je dostavljena svakom pojedinom fakultetu, sa naznakom da je, ili nije, stavljena u funkciju, te ako nije, šta je razlog za to?

Naime, kanton je za pomenutu opremu izdvojio ogromna sredstva, a po mojim saznanjima veliki dio te skupocjene opreme još uvijek nije u funkciji i pitanje je, obzirom na okolnosti, kada će uopšte biti. Oprema je prije svega trebala služiti studentima. I mi kao neko ko je odobrio ovo zaduženje moramo znati prije svega kakva je sudbina te opreme. Pomenuta informacija bi trebala služiti kako bi iznašli rješenje da se pomenuta oprema što prije stavi u službu i u edukaciju studenata.

Zahvaljujem.

Kolega Hajrudin Halilović. A neka se pripremi kolegistica Šušić.

Poslanik Hajrudin Halilović:

Svima vama maksuz selam i lijep pozdrav.

Moje poslaničko pitanje se odnosi na Ministarstvo obrazovanja, nauke, kulture i sporta.

Molio bih ministra da mi dostavi poimenično sastav komisije, od kada radi komisija i rezultate iste komisije, koja radi na procjeni dijece sa posebnim potrebama u obrazovanju, a koja zahtjevaju asistenciju u obrazovnom sistemu, dakle asistenciju u nastavi.

Naime, dobijam utisak da mi smo počeli proglašavati dijecu sa posebnim potrebama u nastavi, da bi smo zadovoljili potrebe povećanog broja zapošljavanja. Ne bi smo smjeli biti nacija koja ima najveći broj degenerika, ili da proglašavamo nekoga ko to ne zaslužuje, da ga proglašavamo sa posebnim potrebama i time pravimo zapravo jedno ministarstvo ili jednu obrazovnu instituciju posebnim sistemom. Dakle, nije to dobro za nas, nije to dobro za našu generaciju. Ja sam to još jedan put ovdje govorio dane bi to bilo dobro. Možda će neko od te posebne dijece biti akademik, profesor, ili doktor, ili bilo šta u životu, a u njegovom dosijeju će naći se informacija da je bio sa posebnim nekim potrebama i imao asistenta u nastavi. Neka djeca su možda posebno nadarena pa im treba asistent, dakle prevazilaze plan i program koji je predviđen za tu generaciju. Možda je njima dosadno na nastavi. Ali me interesuje koji je to

sastav, dakle komisije, ja sam to ministra molio još jednom, koji je sastav komisije, od kada radi, koji su to njihovi rezultati rada?

Hvala lijepo.

Predsjedavajući Skupštine Unsko – sanskog kantona, Nijaz Hušić:

Zahvaljujem. Koleginica Šušić. A neka se pripremi kolega Keserović.

Poslanica Merima Šušić:

Selamim i pozdravljam sve prisutne.

Na osnovu Odredbe Člana 190. Poslovnika Skupštine upućujem slijedeće zastupničko pitanje Ministarstvu zdravstva i socijalne politike, a odnosi se na primjenu Federalnog Zakona o osnovama socijalne zaštite, zaštite civilnih žrtava rata i zaštite porodice sa djecom, a posebno Odredbe Člana 89. pomenutog zakona:

Tražim da mi se u pisanoj formi dostavi podatak da li su i u kom periodu vršene isplate naknada posebno nezaposlenim majkama, a koje su određene pomenutim zakonom?

Dakle, pomenutim odredbama zakona se tretiraju pitanja i naknada umjesto plate ženi majci u radnom odnosu za vrijeme dok odsustvuje sa posla radi trudnoće i njege djeteta, kao i ženi majci koja nije u radnom odnosu, te jednokratna pomoć za opremu novorođenog djeteta, te pomoć u prehrani djeteta do 6 mjeseci, kao i dodatna ishrana za majke dojilje. Dakle, tražim odgovor u pisanoj formi.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Ćufurović. Kolega Keserović nije trenutno u Sali.

Poslanik Asmir Ćufurović:

Uvaženi Predsjedavajući, zamjeniče, Sekretaru, ministri u Vladi usko – sanskog kantona, predstavnici Međunarodne Zajednice, mediji, kolegice i kolege zastupnici, uvaženi građani, sviju selamim i pozdravljam.

Ja imam jedno zastupničko pitanje koje upućujem Javnom Poduzeću Elektroprivreda Bosne i Hercegovine Podružnica Elektrodistribucija Bihać. Pitanje glasi:

Koliko su planirana ulaganja Javnog Poduzeća Elektroprivreda Bosne i Hercegovine na području Unsko – sanskog kantona u 2016. godini, te po kojem kriteriju su planirani iznosi disperzirani po općinama Unsko – sanskog kantona, naravno sa akcentom na općinu Velika Kladuša? Mene ovdje zanima konkretno koji dio, odnosno koji procenat i koliko je to nominalno sredstava planirano uložiti na području općine Velika Kladuša?

Obrazloženje:

Na području Unsko – sanskog kantona generalno imamo problem sa kvalitetnim snabdijevanjem električnom energijom, koje se ogleda prije svega u nedovoljno visokom naponu isporučene električne energije i čestim prekidima, tako nam se i krajem novembra prošle godine desilo da je malo obilniji snijeg gotovo paralizirao Unsko – sansko kanton zbog nestanka električne energije. Ovo je posebno bilo izraženo u tri općine kantona, to su Velika Kladuša, Cazin i Bužim, gdje su pojedini dijelovi općine i po tri dana bili bez električne energije, a onda za posljedicu smo imali i nestanak i vode.

Zahvaljujem.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kenan Keserović. A kolega Kadirić je slijedeći.

Poslanik Kenan Keserović:

Dobar dan. Pozdravljam sve prisutne.

Za ovu sjednicu imam dva poslanička pitanja koja upućujem Kantonalnom Ministarstvu obrazovanja, nauke, kulture i sporta, znači na ruke ministru.

Naime, 07.12.2015. godine postavio sam pitanje u ime učitelja Dželila Asanagića iz Velike Kladuše, znači nastavnika razredne nastave Prva Osnovna Škola u Velikoj Kladuši, koji je na tim poslovima u Velikoj Kladuši radio već preko 36 godina. Iako je gospodin Asanagić se obratio ministarstvu i nije dobio nikakav odgovor, znači ima 3 mjeseca, ja sam isto postavio pitanje gotovo ima 2 mjeseca, nisam dobio nikakav odgovor, evo ponovo postavljam pitanje. Prvo, da li nastavnik Asanagić ima pravo na naknadu u slučaju smrti užeg člana porodice, iz kojih razloga to pravo nije ostvario do danas i kad će ostvariti? I vezano za to, iz kojih razloga ministarstvo obrazovanja, nauke, kulture i sporta nije odgovorilo gospodinu Asanagiću na njegov dopis od 06.11.2015 godine?

Isto tako drugo pitanje sam uputio 09.11.2015. godine, koje sam postavio u ime gospodina Kadira Zulića, oca Ezane Zulić, inače djevojke sa poteškoćama u razvoju, zbog pravomoćne presude. A pitanje znači glasi:

Da li ćete izvršiti navedenu presudu i na taj način ispraviti ovu dugogodišnju znači grešku i diskriminaciju prema ovoj djevojci, znači koja to nije zaslužila i rok znači kad?

Na ovo pitanje znači čekam odgovor 3 mjeseca, pa ja vjerujem u ovih narednih 7 dana da ću dobiti znači odgovor na ova poslanička pitanja.

Zahvaljujem.

Predsjedavajući Skupštine Unsko – sanskog kantona, Nijaz Hušić:

Zahvaljujem. Kolega Kadirić. Neka se pripremi kolega Prošić.

Poslanik Nijaz Kadirić:

Poštovani Predsjedavajući, predstavnici Vlade, uvažene kolege i kolegice, dame i gospodo, ispred Kluba SBB-a sve vas srdačno selamim i pozdravljam.

Ja imam jedno poslaničko pitanje. Naime, 04. marta 2014. godine Opća Bolnica Sanski Most dobila je donaciju medicinske opreme iz Italije. Riječ je o dva šlepera medicinskih aparata. Tada je rečeno u medijima, kako je predstavljeno, kako će se ta oprema, koja uključuje i CT aparat, u narednim danima biti instalirana u bonicu i ustupljena na korištenje pacijentima u Sanskoj bolnici. Međutim, evo skoro dvije godine nakon toga ta oprema nije u funkciji, nije dakle ustupljena pacijentima i ne radi. Evo ja po drugi put postavljam pitanje kada će ta oprema biti u funkciji i kada će biti ustupljena pacijentima u Sanskom Mostu na korištenje i tražim i insistiram na pismenom odgovoru i od direktora Opće Bolnice Sanski Most i naravno od ministarstva zdravstva.

Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem. Ekrem Prošić.

Poslanik Ekrem Prošić:

Dame i gospodo, kolegice i kolege poslanici, predstavnici Vlade, predstavnici medija, građani, ja vas sve skupa srdačno pozdravljam.

Ja nisam bio na prošloj sjednici pa nisam mogao postaviti ovo pitanje, odnosno odgovor koji ću sada dati. Naime, radi se o slijedećem, ja sam znači na 11. sjednici 09.10.2015. godine postavio jedno poslaničko pitanje, na koje nakon tog mog postavljanja nisam dobio nikakav odgovor, niti je bilo ko poduzeo bilo kakve radnje na konstatacije koje sam ja iznio a koje su meni prenijeli građani mjesne zajednice Bajrići iz Stijene. Isto tako, najveći problem je što sam ja ovdje pokazivao određena dokumenta, što niko od novinara nije udostojio se da traži od mene, da pita o čemu se radi, tako da to nije ni medijski popraćeno. Međutim, neki ljudi koji su prozvani tom prilikom oni su to popratili i ja sam od njih dobio jedan dopis, da ispravim svoje izražavanje i zaprijetili su mi Zakonom o kleveti i traže da ja ispravim svoje izražavanje na pomenutoj sjednici, gdje bi se ja trebao izviniti jednoj firmi i vlasniku te firme. Ja sam to pitanje shvatio kao prijatnu. Jer ja kao i vi ostali poslanici, mi smo izabrani od strane građana Unsko – sanskog kantona i mi smo glas građana Unsko – sanskog kantona i sve što građani traže od nas da pitamo za ovom govornicom, mi smo dužni da to uradimo. Ja kad sam izabran za poslanika u Skupštinu Unsko – sanskog kantona ja sam položio zakletvu, znači da ću štiti to i to i između ostalog građane Unsko – sanskog kantona od svih nepravdi i nepravilnosti koje im se mogu dešavati. Za mene i tada i sada su građani Unsko – sanskog kantona svi jednaki i onaj ko ima milione maraka i onaj ko nema ni marke u džepu i ja ih tako posmatram, tako doživljam i ljude samo dijelim na dobre i loše, odnosno na poštene i nepoštene. Ja sam nakon dobijanja ovog zahtjeva za ispravku ovih navoda, gospodine Predsjedavajući dozvolite mi malo duže jer moram, jer ja jednostavno moram, jer ovdje ne radi se samo o meni, radi se o nama svima poslanicima, jer ubuduće može se desiti i drugima slično, da im se pokušaju začepiti usta, ja sam provjerio ponovo kod građana jesu li ti navodi istiniti, jer sam razmišljao možda sam i pogriješio, možda su mi građani dali krivu informaciju pa ja tako prenio. I onda sam otišao u mjesnu zajednicu tamo da to sve isprovjeravam. Znači ja sam tada od građana Bajrića dobio jednu peticiju koju su oni potpisali i dostavili meni, ja sam je ovdje pokazivao kao i sada što pokazujem i dobio sam dvije fotografije gdje se vide kamioni kompanije I CRNI iz Cazina gdje dovoze gume, gdje se vide radnici da istovaraju, u kompaniju KORAK koja se nalazi u mjesnoj zajednici Bajrići, gdje se te gume dalje prerađuju, odnosno gdje se one sjeku, melju, bruse i procesom pirolize znači rastavljaju se u prijašnje stanje, dobije se metal, dobije se mazut, dobije se karbon neki. I znači to se radi tamo u toj firmi u halama u Bajrići, a građani tvrde i danas da ta firma nema nikakvih dozvola za to. Onda smo se zainteresirali i ja i građani pa smo vidjeli kako se dobije ta dozvola, pa smo onda dobili od jedne firme iz Sarajeva zahtjev jedan za izdavanje te dozvole gdje treba ogromna količina papira da se napiše samo taj zahtjev, a da bi se dobile te dozvole ljudi tvrde da treba kamion papira da bi to sve radili, da bi došli do zaključka da je to gotovo nemoguće na području mjesne zajednice Stijena jer tamo nema infrastrukture koja bi omogućila da se ovaj proces nesmetano odvija. Tamo sam dobio znači uvjerenje da je to istina i čak sam dobio priliku da razgovaram sa jednim uposlenikom koji radi u Ciglani u Cazinu, koji mi je potvrdio navode da Ciglana I CRNI koristi, isključivo ona da koristi ta sredstva, taj karbon, odnosno tu prašinu miješa u rudu, a ovo ostalo da miješa u petrokoks, odnosno koristi kao pogonsko gorivo. Isto sam tako razgovarao sa mještanima Ćoralića koji stanuju neposredno uz Ciglanu, koji su mi takođe potvrdili kada Ciglana radi, sada je u fazi remonta, da je nesnošljiv smrad u čitavim Ćoralićima, naročito u noćnim satima, znači

da se tamo ne može maltene živjeti od tog mirisa, pa su i oni isto pokretali nekakve peticije međutim nisu naišli na razumijevanje i danas se žale i potvrdili su da je to tako. Ja smatram da ne treba nikom dozvoliti da, bez obzira što zapošljava radnika koliko zapošljava, da truje građane, odnosno da im stvara takvo okruženje da oni ne mogu ugodno boraviti i živjeti u svojim domovima. Ovdje moram napomenuti da umijesto da su se ovi ljudi izvinili građanima i da su prestali s tim, oni znači idu i dalje i pokušavaju da oni nametnu uslove i da određuju kakav će zrak građani udisati. A ja sam se našao pogođen jer kao poslanik znači imam pravo da postavim bilo kakvo pitanje, što ljudi pokušavaju da i meni, odnosno i nama poslanicima da zatvore usta, da nam zabrane da iznosimo zahtjeve građana ovdje. I ja ću još nekoliko stvari ovdje navesti. Da advokat, Hadžalić Nijaz, zvani Kurčubić, iz Cazina, koji je podnio ovo pismo, odnosno ovaj zahtjev, je onaj čuveni ombdusmen za kršenje ljudskih prava koji je prije nekoliko godina pretukao gospođu, evo ima ovdje neke podatke, nije mogao registrovati advokaturu u Federaciji, pa je to uradio u Bosanskom Novom. I takav ovdje traži nekakvu pravdu da ispravlja. A vlasnik kompanije I CRNI, nije mi bila namjera da se obračunam ni s kim, niti mi je danas, ni da prozivam bilo koga, je isto tako čovjek koji se bavio razno raznim stvarima, između ostalog on i njegova firma nalaze se, evo imam i ovdje podatak, znači na jednom spisku gdje je podignuta jedna optužnica protiv 29 lica koji se sumnjiče za utaju poreza i pranje 21.000.000 maraka. Znači ta optužnica je podignuta u februaru mjesecu prošle godine. Isto tako nedavno je taj isti vlasnik imao i fizički kontakt sa gospodinom, čini mi se Sanel Okić, neka firma ORTO, ORTOSAN, kako se već zove u krugu svoje firme, gdje je čak i MUP morao intervenirati. Ovo samo govorim da znate o kakvim se licima radi. A ako bude trebalo još podataka, imam ja puno podataka. A ovoj gospodi bi bolje bilo da se umiri, ispravi ove nepravde koje čini građanima. A ja im stojim na raspolaganju po bilo kom osnovu. Znači ne bojim se nikoga. Njih naročito. Možemo se naći i vidjeti svaki dan u svako doba gdje god hoće i privatno i politički, kako god hoće. Hvala. Izvini. Još samo ću reći, ovdje tražim od MUP-a, kantonalne inspekcije i drugih nadležnih organa da istraže navode iz peticije građana mjesne zajednice Bajrići iz Stijene i o nalazima da izvjestite građane mjesne zajednice pomenute, kao i javnost Unsko – sanskog kantona. Hvala.

Predsjedavajući Skupštine Unsko – sanskog kantona, Nijaz Hušić:

Zahvaljujem.